

共同經課 - 1

創世記二十二章一節~十四節

1 Chiah-ê t̄ai-chì 以後，上帝試亞伯拉罕，叫伊講，亞伯拉罕；伊應講，我 tī-chia。2 上帝講，你帶你 ê kiáⁿ，就是你獨生 ê kiáⁿ，你所疼 ê 以撒，去 Mô-lī-a ê 地，我所 beh 指示你 ê 山；tī-hia 將伊獻做燒祭。3 亞伯拉罕透早起來，備辦驢，帶伊 ê 兩個少年人，kap 伊 ê kiáⁿ 以撒；亦破燒祭 ê 柴；就起身去上帝所指示伊 ê 地。4 到第三日，亞伯拉罕 kiáh 目遠遠看 hit-ê 所在。5 亞伯拉罕對伊 ê 少年人講，Lín kap 驢 tiàm chia thèng 候，我 kap gín-á 去 hia 敬拜，就 tò 來 lín chia。6 亞伯拉罕將燒祭 ê 柴 hē tī 伊 ê kiáⁿ 以撒 ê 身上，家己 ê 手 kiáh 火 kap 刀；tùi hit-tiáp 兩人相 kap 行。7 以撒 kā 伊 ê 老父亞伯拉罕講，父 ah；伊講，我 ê kiáⁿ，我 tī-chia。伊講，你看，火 kap 柴 lóng 有；總是燒祭 ê 羊 á tī tah-lóh？8 亞伯拉罕講，我 ê kiáⁿ，上帝 beh 家己備辦燒祭 ê 羊 á；tùi hit-tiáp 兩人相 kap 行。9 In 到上帝指示伊 ê 所在；亞伯拉罕 tī-hia 起壇，將柴排好，縛伊 ê kiáⁿ 以撒，hē tī 壇裡 ê 柴頂。10 亞伯拉罕就伸手 kiáh 刀，beh thài 伊 ê kiáⁿ。11 耶和華 ê 使者對天叫伊講，亞伯拉罕，亞伯拉罕；伊應講，我 tī-chia。12 使者講，你 m̄-thang tī chit-ê gín-á ê 身上下手，亦 m̄-thang 對伊怎樣做；因為我 taⁿ 知你是敬畏上帝，亦無將你 ê kiáⁿ，就是你獨生 ê，留 teh，m̄-hō 我。13 亞伯拉罕 kiáh 目看，看見後面有一隻羊 káng，角纏 tī kui 抱 ê 樹 á；亞伯拉罕就去掠 hit 隻羊 káng 來，獻做燒祭，來替伊 ê kiáⁿ。14 亞伯拉罕名 hit-ê 所在叫耶和華以勒；到今 á 日人 iáu teh 講，Tī 耶和華 ê 山 beh 備辦。

共同經課 - 2

詩篇十三篇

1 大衛 ê 詩，交 hō 樂官。1) 耶和華 ah，你 boē 記得我，beh joā 久 ah？到永遠 mah？你掩面 m̄ 看我，beh joā 久 ah？2 我 ê 心神想來想去，我 ê 心 thong 日憂苦，beh 到 joā 久 ah？我 ê 對敵高升贏過我 beh 到 joā 久 ah？3 耶和華我 ê 上帝 ah，求你看顧我，聽我；Hō 我 ê 目矚光明；驚了我睏到死；4 驚了我 ê 對敵講，我 khah 贏伊；驚了我 ê 仇讎 tī 我搖 choah ê 時來歡喜。5 總是我 oá 靠你 ê 慈愛；我 ê 心因為你 ê 拯救來快樂。6 我 beh 唱歌 o-ló 耶和華；因為伊用大恩款待我。

共同經課 - 3

羅馬書六章十二節~二十三節

12 所以莫得容允罪惡做王 tī lín 會死 ê 身軀，致到 lín 順 thàn 伊 ê 私慾；13 也莫得將 lín ê 百體獻 hō 罪惡做不義 ê 器具；是 tiòh 將本身獻 hō 上帝，親像 tùi 死人中來活 ê，也獻 lín ê 百體 hō 上帝，做義 ê 器具。14 因為罪惡無 koh 管轄 lín，因為 lín m̄ 是 tī 律法下，是 tī 恩典下。15 Án-ni 就怎樣？咱既然 m̄ 是 tī 律法 ē，是恩典 ē，thang 犯罪 mah？斷斷 m̄-thang。16 Kiám m̄ 知 lín 獻本身做奴僕來順 thàn 伊，就是做所順 thàn ê 奴僕，或是做罪惡 ê 奴僕致到死，á 是做順 thàn ê 奴僕致到義？17 感謝上帝因為 lín 前做罪惡 ê 奴僕，taⁿ bat 甘心順 thàn lín 所入 hit-ê 教訓 ê 規模；18 已經得 tiòh tháu 放脫離罪，就做義 ê 奴僕。19 我因為 lín 肉體 ê 軟弱，就照人 ê 事來講；因為親像 lín bat 用 lín ê 百體獻 hō 污穢不法做奴僕，致到不法，taⁿ tiòh 照 án-ni 用 lín ê 百體獻 hō 義做奴僕，致到成聖。20 因為 lín 前做罪惡 ê 奴僕，hit 是 lín 無 hō 義管轄。21 當 hit 時，lín 得 tiòh 甚麼果子 tī 現今所見笑 ê ah？因為 in ê 結局是死。22 Taⁿ lín 已經得 tiòh tháu 放脫離罪惡，來做上帝 ê 奴僕，得 tiòh 果子致到成聖，hit-ê 結局是永活。23 因為罪惡 ê 工錢是死，但是上帝 ê 恩賜是永活，在 tī 咱 ê 主基督耶穌。

共同經課 - 4

馬太福音十章四十節~四十二節

40 接納 lín ê，就是接納我；接納我 ê，就是接納差我 ê。41 為 tiòh 先知 ê 名來接納先知 ê，beh 得 tiòh 先知 ê 賞；為 tiòh 義人 ê 名來接納義人 ê，beh 得 tiòh 義人 ê 賞。42 見若為 tiòh 學生 ê 名，kan-ta 用一杯冷水 hō chiah-ê 細 kiáⁿ ê 一個 lim ê，我實在 kā lín 講，伊決斷 boē 失落伊 ê 賞。